



Kommunik aqqissusseqqinneq nalilersortariaqalerner a pillugu apequteqaat aallaavigalugu oqallisissiaq.

(Inatsiartunut ilaasortaaq Aqqalu C. Jerimiassen)

Siullertut Atassumut qujarusuppugut matumuuna apequteqaat aallaavigalugu oqallisissiamik naleqqulluurtumik saqqummiussisimmata. Aammattaarlu Naalakkersuisunut qujavugut akissutimimi iliuuserineqarsinnasunik aaliangersimaqqinnaartunik tikkuussimmata. Oqariartuutit unamminartut arlallit, nunattalu ataasiusutut siuariartornissaanut aqqiissutaasinnaasunik siunnersuutit arlaqartut maluguniarsimavakka. Taakkualu matumuuna oqaseqarfigissavakka.

Atassutip piffinnut qanga eqqortuusunut, toqqissisimanartunut, pitasaasunullu utersaarnissamut kissaatigisaa iluarinaqisoq qularineqassanngilaq. Nammineerlunga 90'ikkunni Qeqertarsuarmi peroriartorsimavunga, taamani illoqarfik namminersorlutik inuussutissarsiortunik pimoorussilluurtunik aqunneqarsimavoq, kilisaatinik raajarniutinik, aalisariutinillu aalisakkerivimmi suliuassaqartitsisijuarsimallutillu, kommuuneerannguami aningaasat tungaasigut patajaatsuutitsisimasunik. Aappi, taamani ineriartortoqarsimavoq, ajoraluurtumillu ullumikkut taamaattoqanngilaq. Suliffissat, ilinniarneq il. il. pequtugalugit innuttaasuni nukittunerit amerlanersaat allamut nuussimapput. Ilai angerlamut uteriaraluarsimapput, ajoraluurtumillu kommunalbestyrelse peqanngitsoq ersarinngittorlu, innuttaasunullu takuneqanngitsutut, peqataatinneqanngitsutullu misigititsisoq pequtugalugu unammilligassarpasuaqartoq paasisimavaat. Aap, illoqarfinnut nuttarneq, qitiusumiillu aqutsineq apuutivissorsimavoq. Taamaammallu Kommunik aqqissusseqqinnerup ineriartornermut sakuuluurtutut ajoqutaasuunngitsutullu periarfissaanera atorluartariaqarparput.

Pissutsit ilumoortut, nuanarsuarmilu ineriartorneq takusarput tunngaviginiartariaqarpagut. Nunarsuarmi siaruarnermut akuulersimavugut, kisimiillutalu nunarsuarmi pisunut mattulluta nunarput aqussinnaajunnaarlugulu ineriartortissinaajunnaarsimavarput. Taamaammallu inuiaqtigiinni aningaasarsiornerup qaffassarnissaanut sinaakkutissanillu pilersitsisuaannarnissatsinnut, inuiaqtigiinnilu agguanneqartussat amerlisarnissaannut periarfissatsisallavoq, taamaalinikkullu tunguinerimi ikiersiissutitut piumasatsinnut akissaqarnerulissaagut. Akuerisariaqarparput kommuunit akornganni assigiinngissuteqartoqarmat.

Innuttaasunut sullisineq qaninnerulerteqqinniarlugu Qaasuitsup kommunea marlungorluni avissimavoq, ukiullu ikittunnguit qaangiussimapput Kommune Qeqertalik pinngormalli. Tamat oqartussaaqataanerit innuttaasunut qaninnerusoq, kiffartuussinermilu neqeroorutaasut innuttaasunut qaninnerusuutinniarlugit anguniagaq imminermi pitsaasimavoq. Kingunipiluutaasinnaasulli arlalertigut piuguinnartarparput, tassaavorlu akinga. Akeq inuit ikitsuinnaat peqataaffigisinnaasaat. Isertortuunngilarmi nunarsuarmi



innuttaasut amerlassusaannut sanilliullugu annerpaamik allaffissortunut ilaagatta. Pisortat allaffissornerat suli alliartorpoq, ineriartornerlu taanna eqqortuusoriunngilarput. Innuttaasut qaninnerusumik sullinneqarnissaannut akissaqarnerorusuppugut, tassanilu eqqasaatigineqarput isumaginninnermik suliassa qarfiata, suli atualinngitsut suliassa qarfiata aammalu innarluutillit suliassa qarfiata pisangorssavigineqarnissaat. Pitsaalluinnarpoq komuunini najukkami ataatsimiititalianik pinngortitsinikkuq qanittumi tamat oqartussaqaataanerannik pinngortitsisoqarsimammat, ataatsikkulli eqqarsarnartoqartippara taamaattunik pinngortitsineranut pisariaqartitsisoqarsimammat. Eqiterinerummi kinguneranut takussutaanerluni? Politikerit innuttaasunit toqqarneqarsimasut inuiaqatigiinnut ungasippallaalersimappat? Allaffissorluta ingerlatsinerput annertusaannarniarutsigu, tamatsinnut akisuneruleriartuinnassaaq, pingaarnertullu suliassatsinnut ajortumik kinguneqartitsisinnaavoq. Qeqertallip Kommuneata pinngortinneqarsimanera innuttaasunut iluaqutaasimava? Tamanna ersarissumik oqaatigisinnaangilarput, isumaqanngilagulli allaffissorneruneq inuiaqatigiinnut iluaqutaasoq.

”Subsidiaritettsprincippet”-imut isumaqataavugut, tassanimi allannguutissatut siunnersuutit unammilligassanut qaninnerpaajullutik aalajagiunneqartartussaammata. Taamammallu isumaqarpugut kommunit suleqatigalugit ineriartornermut ungasinnerusumut isigisumut, nutaaliortuusumut inuinaallu iliuuseqarnissamut kiffaanngissuseqarneranut nalequssartariaqartugut. Assigisaannillu naatsorsuutigaarput komuunit naleqqussarnissaminnut piunassuseqarnerunissaat namminerlu aqqissuussisimanertik naleqqussassagaat, taamaalillutik tunngaviusumik suliassatik torrannerusumik, piunarnerusumik, akikinnerusumillu ingerlassinnaanngorniarlugit, tamannalu naggataatigut naleqarnerulersitsissaaq. Asserssutitsialattut taarusupparput Kommuneqarfik Sermersuumi nittartakkatigut innuttaasunut qaninnerusumik tamat oqartussaaqaataanerat atuutilissammat, tassuunakkulli innuttaasut paasisutissanik pisariaqartunik misissuisinnaangussapput, aammalu apeqquuminut akissutunik nassaarsinnaalutik, aammalu najugaqarfiup eqqaaniittunik pilersaarutaasunik paasisaqarsinnaallutik. Aammattaaq maani nammineq piunassusertik tunngavigalugu sulisarneq qaffasippoq, taamaalillutillu kommunalbestyrelsi kommuniminni innuttaasunut tamanut iluaqutaasussanik aalajagiisarnissaminnut tunngaveqarluartarput.

Kommuunit akimorlugit suleqatigiissinnaanerput nukittorssarniartigu, unammillersinnaanerput allisinniartigu naleqarnerulertitsinissaq ineriartortitsinerlu qaffassarniartigit, minnerunngitsumillu ataatsimoorneruniarta kissaatigisarput anguniarniarlugu; tassaasoq inuiaqatigiit inuppalaartumik, aningaasatigulli peqitsuusumik ingerlasumik pinngortitsinissaq, pisimasunit ilinniartoq, siunissamullu takorluuisinnaasoq.

Illoqarfinnut nuttarnerep nunat assigiinngitsut akornganni nalinnaajartuinnarneranit, teknikkikkullu atortunik atuinerunermiit avissaarsinangilagut. Illoqarfinnut nuttarneq Demokraatit akuaarparput. Inuit ataasiakkaat periarfissarineqartut tunngavigalugit, toqqaanisamut iliuuseqarnissamullu nammineq aaliagiisinnaassusaat tapersorsorparput. Assigisaannillu niuersinnaanermut periarfissat killilersugaanngitsut aamma taamatut isumaqarfigaagut. Siunnersuuteqartup ilanngussamini immitsinnut paasisinnaannginnerarpaatigut, taannalu peqqutigalugu Kommuninik aqqissuusseqqinnerup ataqatigiinnera ajortussarsiorfigalugu. Uanga oqarusunneruvunga aqutsisut, oqaatsitigut, politikikkullu suleqatigiikkusunnerput ataqatigiissaarinnermut ajornartorsiutaasunik unammilligassaqaartitsisuusut. Uagut



qinigaasuuvugut, uagut akisussaavugut, uagullu suleqatigiinnissamut immitsinnut pisussanngortittariaqarpugut.

Taamaammallu maani ataatsimiittarfitsinni isumaqatigiilluta oqariartuuteqarta avannaanit kujataanut, kangianiillu kitaanut assigiingittuungaluarluta, inuiaqatigiinni aqqissuunneqarnerput kissaatigisarput pinngortinniarutsigu tamatta immitsinnut pisariaqartilluinnartugut. Taamaaliussagutta innuttaasut tamarmik uummataatigut attorsinnaasariaqarpagut ataatsikkullu niuertorpalaartumik periuseqartariaqarpugut pisariaqartitatsituut ineriartorniarutta. Sinngasarnersuaq unitsittariaqarparput killormuanillu isumassarsiorlutalu namminerlu isumassatsialaat iliuuseqarfigalugit. Isumassatsialaat alliantorsinnaasut, inuinnarmullu, inuiaqatigiinnullu naleqarnerulersitsisinnaasumik suliffeqarfinngorsinnaasut.